

Ti dé valour a n patrimoine global

L calender 2011 realisé da la Fondazione Fontana con l
contribut dla Pat conta dl impegn de na tera de mendranzes
te n mond biodesferent



La souracuerta dl calender sun les mendranzes.

Mendranzes - Al é vegnù prejenté chisc dis passés l calender 2011 "Mendranzes a chi?" tl cors de na conferenza stampa a chela che à tout pert l'assessoura provinciala a la solidaritè internacionala Lia Giovanazzi Beltrami. Realisé da la Fondazione Fontana adum con truepes d'autres realtés dl mond dles associazions dl Trentin y con l sostegn dla Provincia autonoma de Trent, chest calender vuel zelebré n mond biodesferent, nia valivé y nia omologhé, che auza fora les mendranzes trentines - Ladins, Mochehn, Cimbri - ma ence cheles di paisc plu dalonc, olache les associazions de voluntariat provinciales porta inant projec de solidaritè internacionala. Vigni meis dl ann porta dant n popul de mendranza dl mond: Guaraní (Brasil), Saharawi (Sahara ozidental, ex Sahara spagnol, encuei sot l govern dl Maroch), Ashanti (Ghana), Rom (Europa, chilò en particular l raion balcanich), Achuar (Ecuador, Perù), Tibetans (Tibet, en gran pert sot l control dla Cina), Ladins, mochehn y Cimbri, Batwa (Ruanda y Burundi), Miskito (Nicaragua, Honduras), Cunama (Eritrea, Etiopia; Sudan), Guaymì (Costarica), Karen (Birmania), Hmong (Vietnam). Valch una de chestes popolazions viv situazions de gran dificolté, perseghitedes o sotmetudes a l'autoritè di governs o de popui plu stersc, o che ceida enchinamai de mori fora.

L'assessoura Giovanazzi Beltrami à dit che chest calender auza fora n messaje scialdi fort, che met al luster l gran impegn dl Trentin per la defendura y la valorisazion nia demé de sies mendranzes

linguistiches ma ence de cheles fora da sies confins.

L dirigent dl Servisc Mendranzes dla Pat Marco Viola à recordé che les mendranzes é l sel dl mond per cie che al é la desvalivanza che ti dà saour a la vita. Perchel él debujegn de conesce, defene y valorisé les mendranzes.

Les associazions che à tout pert a la realizazion dl calender é: Shishu, Tempora, Tre.Ca.Sma, I bambini di Besoro, Ashanti, Assoziazion trentina de aiut per i Balcans, Assoziazion Padre Silvio Broseghini, Samten Choling. Istitut Cultural cimbro, Zenter de documentazion de Luserna, Istitut Cultural ladin de Fascia, Museo Ladin de Fascia, Istitut Cultural mochen, Museo Mochen, Amisc dl senatour Spagnolli, El Quetzal, Centro Missioni Cappuccini, Assoziazion amisc dl cor Valsella per l'Eritrea, Projet Orchidea, Moses, Amisc dla Neonatologia trentina.

L'assessoura Giovanazzi Beltrami à porté dant ence trei projec nuefs de solidaritè internacionala sostegnus da la Pat. L prum, dl'assoziazion Moses de Madonna di Campiglio, se tol dant de asseuré l azes a l'istruzion per 230 bec y joegn anter 14 y i 17 agn che vif te n ciamp per sciampés tla Birmania; l secont, dla Federazion provinciala di Zidladours dl Trentin, vuel sostegni la renasciuda economica de Srebrenica tla Bosnia; l terz é n intervent trienal de dimenjions granes, realisé adum con i trei governs dl Euregio, chel dl Trentin, dl Sudtirolo y dl Tirol, te n raion de confin anter Uganda y Tanzania, con l obietif de sostegni l svilupp dles comunités rurales.